

吳  
中  
人  
物  
志

吳中人物志卷之九

長洲張景春甫輯

曾孫獻翼論贊

逸民

春秋

披裘公吳人也延陵季子出遊見路有遺金當夏五月有披裘而薪者季子呼薪者曰取彼地金來薪者投鏹于地瞋目拂手而言曰何子居之高而視之下儀貌之壯語言之野也吾當夏日披裘而薪豈取金者哉季子謝之請問姓字薪者曰子皮相之士也何

足以語姓名遂去不顧

漁父伍胥奔吳追者在後至江上有一漁父乘船知  
伍胥之急乃渡之胥既渡解劍直百金與父父曰楚  
國之法得伍胥者爵執珪豈徒百劍耶不受一笑刺  
船而去

漢

陸著字文伯郡人桓靈之間州府交辟不就惟娛栖  
遁將卒戒其子弟曰吾少未嘗官遁世四十餘年汝  
等必矜義勿苟仕濁世因遵遺訓故三代不仕皆有  
盛名

角里先生姓周名術字元道太伯之後一號霸上先生今太湖中洞庭山西南中有角里村是其所居  
臯伯通字奉卿吳之大姓也有賢行梁鴻嘗客其家以賓禮重之鴻卒伯通為葬焉後名所居曰臯橋  
龍丘萇郡人王莽時隱居太末以耕稼為業公車徵不應更始時任延為東部都尉折節下士鍾離意為主簿自請萇為門下祭酒延曰龍丘先生清過夷齊志慕原憲都尉洒掃其門尚懼辱之何召之有歲餘署為儀曹祭酒

何敞抱道隱居吳大旱太守慶弘遣戶曹致謁奉印

綬煩守無錫敞不受歎曰郡界有灾安得懷道因跋涉之縣駐明星屋中蝗蝻消死敞即遁去後舉方正博士皆不就

晉

張翰字季鷹吳郡人有清才縱任不拘時人號為江東步兵會稽賀循赴命入洛經吳閶門於船中彈琴翰初不相識乃就循言同載而去不告家人齊王冏辟為大司馬東曹掾問時執權翰謂同郡顧榮曰天下紛紛禍難未已吾本山林間人無望於時子善以明智自防榮執其手曰吾亦與子採南山蕨飲三江

水耳翰因見秋風起乃思吳江菰米蓴鱸曰人生貴  
乎適意何能羈宦數千里以要名爵乎遂命駕而歸  
俄而問敗人皆謂其見幾或謂之曰卿柰何縱適一  
時獨不為身後名耶翰曰使我有身後名不如即時  
一杯酒年五十七而卒有文數十篇

夏統字仲御會稽人引身不仕母病薦詣洛市藥會  
上已洛中王公並至浮橋車乘如雲統視之蔑如也  
賈充引船與語其應如響勸之仕俛而不答充曰卿  
能作鄉土地間曲乎曰昔曹娥投水國人哀之為作  
河女之章伍子胥以忠投海國人哀之為作小海唱

今欲歌之於是以足叩舷引聲清激大風應至雲雨  
交集充令妓女盛服繞船三匝統危坐如故若無所  
聞充悵然曰此吳兒木腸石心也

瞿硎先生字磻子晉太和末居宣城文脊山中桓溫  
與其僚嘗造之見其披鹿裘坐石室神無忤色溫異  
之乃命從事伏滔為之銘贊而去

陸璣字仲芳毗陵人明京氏易尚書風角星筭皆極  
精與辟主簿祝事旬日謝病去隱會稽山

韓績字興齊父仕吳績少好文有隱操布衣蔬食不  
交當世由是東土並敬重之司徒王導聞其名辟掾

不就咸康末會稽內史孔愉上疏薦之詔徵以安車束帛復召拜博士稱病不起

南朝

何求字子有清退無嗜慾宋泰始中還吳除中書郎不拜居波若寺足不踰戶人莫見其面明帝崩出奔國哀除永嘉太守一夕乘小船逃歸于武丘山弟點胤二人

點字子哲年十一居父母喪幾至滅性及長感家禍遂絕婚宦點眉目明秀容貌方雅不以門戶自矜嘗遨遊人間不簪不帶以人地並高無所與屈或乘柴



車躡草屨恣心所適兄卒蔬食不飲酒訖十三年太  
始末徵太子洗馬齊初累徵中書侍郎太子中庶子  
梁天監中以侍中召俱不就

胤字子季年八歲居憂致毀如成人仕齊累官中書  
令拜表解職東還會稽若耶雲門初胤二兄求點並  
栖遁求先卒人謂點為大山胤為小山求曰東山謂  
何氏三高也永元中徵為太子詹事梁時召為特進  
光祿大夫亦不就給白衣尚書祿固辭之

顧歡字景怡郡人家貧好學母亡廬墓遂隱不仕開  
門聚徒近百人齊高帝輔政召為揚州主簿遣中使

迎之及踐祚乃至自稱山谷臣上表獻治綱一卷遂  
辭歸武帝永明元年詔徵太學博士同郡顧黯為散  
騎侍郎黯字長孺素有隱操與歡俱不就徵

唐

史德義咸寧初隱居虎丘山以琴書自適或騎牛帶  
瓢出入郊郭東京號為逸人高宗聞其名召赴洛陽  
尋稱疾歸公卿皆賦詩餞別德義亦以詩留贈其文  
甚佳天授初江南道宣勞使周興表薦則天徵赴都  
詔曰蘇州隱士史德義志尚虛玄素履貞恪謙冲彰  
于里閭孝友表于閭庭固辭徵辟長往嚴陵之灘多

謝簪裾高蹈愚公之谷風操可知啓沃攸貯特宜優  
獎委以諫曹後以朝散大夫放歸丘壑

張從師郡人歷官五政忘懷樂道如浮雲無心野鶴  
獨立上元二年卒葬武丘山張說為之撰銘稱為唐  
逸士張從師之墓

陶峴崑山人以文學自負通曉八音不謀宦達富有  
田業悉付與人製三舟遍游江湖一以自載一置賓  
客一貯飲饌遇佳山水必窮其勝開元末名聞于朝  
經過郡邑靡不招之峴不肯來自謂麋鹿野人非王  
公上客亦有不招而自詣者吳越之士號為水仙素

慕謝康樂為人自言終當樂死浪迹三十餘年歸老于吳為峴客者孟彥深孟雲卿焦遂也

凌士燮吳人官助教居京師構蓬屋以備揖讓之位柳子原為序其蓬屋詩曰大江之南其舊俗也不出環堵坐入吳甸包山震澤若在牖外所謂求仁而得斯固然歟與夫南音越吟慕望而不獲者異日道也朱處士亡其名杜牧之嘗贈詩云我愛朱處士三吳居中央罷亞百頃稻西風吹半黃又云我昔造其室羽儀鵞鶴翔交橫碧流上竹映琴書牀出俗無近語堯舜禹武湯誦此詩可以得其槩矣

陸龜蒙字魯望元方七世孫父賓虞以進士歷官侍  
御史龜蒙累舉不中家貧思祿養往從湖州刺史張  
搏游歷湖蘇二郡佐嘗至饒州三日無所詣刺史率  
官屬就見之龜蒙不樂拂衣去居松江甫里多所論  
撰雖幽憂疾病貲無十日計不少輟有田數十畝屋  
三十楹田苦下雨潦則與江通故常苦飢躬畚鍤之  
勞嗜茶置園顧渚山下歲取租焉性高潔不喜與流  
俗交雖造門不肖見不乘馬嘗升舟設蓬席齋束書  
筆牀茶竈往來江湖間自稱江湖散人或號天隨子  
甫里先生自比涪翁漁父江上丈人後以高士召不

至唐末以左拾遺授之詔下而卒光化中贈右補闕  
龜蒙善為賦與顏薨皮日休羅隱吳融為友所著吳  
興實錄四十卷笠澤叢書三卷松陵集十卷

徐脩矩吳人恩王府記室參軍奕世才賢持身介潔  
有書萬卷有田五畝步草屋十數間優游自適不復  
出仕皮日休嘗就借書于時有任晦由涇縣尉退居  
里中得顧辟疆舊園有深林曲沼危亭幽砌沼中又  
為島嶼脩篁嘉木掩映隈隩晦性高放好奇勝日休  
與陸魯望嘗往返因作二游詩以遺之

宋

郁先生居郡城光盪巷丁晉公童子師也祥符中晉公為平江節度使持節至吳首入委巷謁其廬拜之先生大呌曰拜殺老夫矣坐定話舊且云荷少年櫛楚教誨之力後卒為治彞甚厚

侍其汚字國紀上世自密州徙吳汚五舉禮部退為鄉先生與人交殊淡泊遇人急難奮義以往滕達道嘗言汚行義脩潔天下之強士君子門人私謚為夷晦先生卒于治平三年

陳郢之奇之兄不聞其字范文正公以先生稱之錢氏婦朝也郢有兄皆仕宦郢獨隱處里中以琴書自

樂晚好佛老不如輦下晉公之甥也晉公欲薦之以  
官郢終拒之有詩誦美

閻丘孝終字公顯嘗知黃州作栖霞樓未幾掛冠歸  
與崇太平輩以耆德稱蘇子瞻謫黃時與孝終友善  
過吳嘗飲酒賦詩其家又云蘇州有二丘不到虎丘  
即謁閻丘其為蘇所重如此

姚安世家郡中飲馬橋所居扁室極齋能文詞亦善  
韓博自號丹元子元祐間往來京師與王定國遊自  
言曰接上清諸仙蘇子瞻一見奇之以為異人稱其  
詩有謫仙風采屢贈以詩安世嘗作步天歌



胡稷言字正思特奏補官為山陰丞致仕歸築五柳堂清脩寡慾日晡後不飲食年八十餘卒子嶧字仲連累舉不仕號如村老人

楊懿儒字彞甫其先浦城徙家長洲少孤力學以行義隱處與方惟深同稱吳中二老家貧朝無夕儲讀書哦詩泊如也未嘗有飢寒憂雖閭里不盡知其貧崇寧二年特奏名後調南昌簿居一歲忽載妻子歸吳下即告老以承奉即致仕平居任真自信不知世間有傾巧事不入州縣不事鄉里請謁間一詣所親厚歲不過數四雖嘗出仕而人猶謂隱者

范周字無外仲淹之族負才不羈安貧樂道尤工詩  
詞詠懷有云一瓢有道泰山重五鼎不義鴻毛輕其  
氣激烈如此

王伯起字聖時居吳江震澤少受經於王荊公

米珣字永叔吳中隱君子也鄉人罕識之章丞相程  
光祿特與之善

湯仲友字端夫其先名益學詩於汶陽周弼早登知  
府二吳之門浪迹湖海晚復歸吳詩有壯遊集其過  
葛嶺賈相宅一篇最爲人所稱

高常字履常一字可久爲人清臞洒落性嗜吟咏有

詩名覆瓿集弼為之序年六十四卒無子捐宅為妙智院

顧逢字君際嘗舉進士不第學詩于弼稱顧五言自署其居曰五字田家放情山水有詩刻行于世後辟為吳校職卒年七十四所著別有船窓夜話負暄雜錄各一卷

陳瀧字伯雨其先汴人紹興初始家于吳瀧博涉經史百氏深於春秋鄉薦漕試皆不第放情山水個儻有晉人風從周弼馮去非為詩所著有淡泊集九卷凡四伯首與湯仲友高常顧逢皆端淳名士同郡陳

發常評臞鶴高樓梅清澗幽為四詩之趣嘗輯為一  
編名蘇臺四妙子鐸

王誼字正仲一字漢臣鄉賢蘋之姪師事楊中書初  
弼以學行鳴於時秦檜當國忌天下能者誼因衆忿  
為罷相論以刺之檜怒貶象州十年乃歸遂不仕有  
春秋類書并文集行于世

鍾璇字振遠一字叔齊常熟人少孤育于龍圖林先  
生適家林氏多書璇得遍閱與林氏三子肄業舉子  
既皆登第璇遂弃去舊習侍官台州嘗游岩谷間遇  
異人語皇極大中之道自是省悟不溺名利放浪漁

釣間築室梅里自號藥圃隱房所著有藥圃橐山中  
錄續孔白帖秦漢以來鍾鼎奇字多藏于家家雖貧  
不戚戚然有求者解衣分粟無靳色郡守沈揆嘗造  
其廬范成大為參政時嘗薦之于朝不報

姚原字子東長洲人七歲而孤自知讀書嘗應舉弃  
去曰窮達有分名不我遂由是絕意仕宦惟務著述  
自號北窓居士有纂玄五十卷洞微經十八卷剡溪  
叢話玉林瑤編等書其作詩尤工卒葬徐侯山朱思  
撰銘

顏禧字景鑑父祖皆仕而有賢名禧雖受世賞不求

祿仕居光福山中閉門讀書著述甚富紹興間郡以  
遺逸薦遂隱居五十年名重鄉里築室邛村表曰漫  
莊自號痴絕叟嘗與吳興施元之注蘇子瞻詩行世  
李無晦字行中自雪川徙居吳江高尚不仕以詩酒  
自娛晚治園亭名以醉眠子瞻兄弟嘗過之為留題  
云

范良遂初名之傳字次卿卜居崑山車塘放情山水  
不慕榮利兄之柔寢貴視之泊如自號墨莊居士有  
詩集十卷子慶家通判建康

范朝宗字伯海能詩有岩栖集乃晚從釋氏卜居洞

庭

章康字季思都官郎中甫之四世孫隱居吳城西足跡未嘗越州境而四方之士無不知有章季思以不見為歎嘗問學於朱仲晦默有所契日以詩篇陶寫年七十餘步履如飛仙或訝其有方外之遇則曰吾師聖賢無他慕也有詩五十卷文十卷名雪厓集

滕歲字季度郡人居子城後閭槁好學淹貫經史不樂仕進安於退處淳熙中以賢良徵不應後屢有薦之者視之泊如晚家齊女門僻處士大夫知其賢多就見之清談竟日一語不及私葉適奏其學行特受

為康靖居士

王楙字勉夫著作王蘋從孫少失父奉母以孝聞長  
刻苦于學嘗著野客叢書三十卷門分類聚鉤隱抉  
微考証經史百氏下至騷人墨客佚言細大不遺又  
著巢睫稿筆五十卷子德文字周卿嘗注魏了翁渠  
陽語孫殺字行父著雲嶠類要

張慶之字子善少有志操絕意仕進好為山水之遊  
著虎丘山賦傷五柳先生作海峯野逸傳以伯夷蔣  
詡陶潛司空圖自況且謂沉冥似海峻厲似峯時人  
尚其孤介初文丞相知平江慶之在諸生列國亡集



杜句述丞相大節人多義之有海峯文編三卷老子  
註測靈衍語

周才字仲美武仲五世孫祖曷常熟尉因家焉宋亡  
征南帥府檄才與武弁分部撫安郡之屬邑括民金  
帛不得則魚貫斬之才為勸解破械縱去兵所屬男  
女鬻於市者詢其鄉里而歸之其排難解紛不遺餘  
力事平置縣設官同列上其功謝曰吾前朝賤士也  
所以周旋患難者不忍生民塗炭耳茲得為太平民  
幸矣忍復希名位哉才有文學嘗著宋史略并其平  
日所作有吳塘稿皆藏于家

元

師餘字學翁其先眉州人父曾定仕蘄州教授嘉熙間東入吳遂為吳人餘少失怙恃自勵于學清脩力行世味泊如開門講授執經者甚衆平生所為詩文多不存稿晚歲有樓裂集一卷

錢仲鼎字德鈞通州人徙居於蘇之蒲帆巷在宋以詩經發解元兵渡江不復仕進志尚蕭洒嘗手鐻其鬚曰吾老矣有子弗克世其學得傳諸人猶不恨由是講授于鄉詵詵輩出年九十步行十餘里手不持杖灯窓細字夜分始寐時汪澤民為郡推每朔旦親

候見後以高年耆德旌其門

徐孝祥吳江同里人隱居不仕自奉泊然惟好客歲常釀酒客至必留飲盡歡一日步後園見片石甃平一穴樹下啓視之皆白金也亟掩之一毫弗取幾三十年人無有知者至治壬戌歲大歉孝祥乃探啓其穴日取數鋌市糴米穀以散貧人賴其全活者不可勝計殆罄是金乃已時女將適人惟荆布遣之而於穴中之金鎰銖無犯可謂義而介者也子純夫以明經發解官翰林供奉承旨孝祥得受封如其官年九十七壽終

陳徵字明善遠祖篆宋宣和進士官左朝散大夫家廬山下徵少從章廬吳先生學嘗北遊燕趙而歸遂家于吳徵為黃清樵高士之甥清介孤峭甚似其舅讀書鼓琴不慕榮進泊然無累以終其身其才雋尤為當時大老虞揭輩所稱子汝秩字惟寅能世其家學安貧樂道教授鄉里色養得親之歡心詩文藻麗不群蕭然有出塵之想弟汝先汝言子繼自有傳

張雯字子昭宋南渡家錢唐徙吳少嗜學世從儒先君子遊宋亡餘廿年時故老猶有存者雯求其人訪宋遺事歲一再往錢唐徘徊故都哀不能已平生精

人物志卷之十一  
通律呂之學家臨于市築樓藏書甚富子田嘗裒集  
所著書曰繼潛錄并書畫記補遺墨記共若干卷孫  
有

黃公望字子久本常熟陸氏繼永嘉黃氏故名公望  
而字子久吳人以一為大以風為痴又曰大痴人因  
稱為大痴道人早嘗試吏浙西憲司丁母艱哀毀骨  
立自是絕意仕宦世以繪事知名而掩其文學其學  
尤旁通九流百氏音律筭數無不精曉嘗游錢塘與  
陳存甫論性命之理公望曰性由自悟命假師傅存  
甫云不然性則由悟必假師傅命則從傳必由理悟

公望服其論又見金日岩老師問曰汝何人邪荅曰黃子久也師曰通身不是汝唯有此聲是汝公望於言下有悟樂南山筇箕泉創草庵于其上將終老計未幾復還吳中築三教堂從游者甚衆公望生故宋德祐己巳八月十五日卒於至正甲午十月二十五日年八十六

錢良佑字翼之世為蘇人至大間省署為吳縣學教諭領職即代去輒不復出隱居三十年安貧守約未始有干於人精于書篆隸真行各臻其妙嘗被旨書大學衍義農桑撮要有叩良佑曰錢氏起五季有吳

越子孫在東南君其裔耶良佑謝曰此無從稽也其  
先有甓壇沽酒者每見故書帑輒拾聚而焚之曰吾  
子孫後有興於文學者其人服其質直晚號江邨氏  
朱鐸字子新郡人父祖貲雄于鄉鐸勵志苦節讀書  
工為詩詞尤善行草手錄奇書異傳至老不倦晚益  
散其財肆情山水遇酒輒醉吟視覆敗若不經心既  
而飄然去其里僑居笠澤之濱後不知所終

曹貞字元度常熟福山萬戶族人元季喪其家貲  
去游江海寄意詩酒間嘗作十洲三島詩甚工不娶  
而終

王璵字仁仲郡人學有淵源工詩章書翰尤善鼓琴  
隱居不仕逍遙野服或騎驢市廛或策杖林野人莫  
測之自號城南逸民

嚴恭字景安嘉定人累世宦達恭獨志尚雅淡不樂  
仕進嘗築室海上號惜寸陰齋日以游戲翰墨為事  
呂肅字敬夫初名誠工於詩崑山才士袁呂為首稱  
楊廉夫嘗序其詩風流俊采極一時之選肅嘗師鄭  
東之亦稱其氣夷色莊學端識敏邑聘訓導不就有  
來鶴亭稿既白軒稿番禺稿竹洲歸田稿

唐元字本初吳人讀書博雅嘗以所乘舟號一葦航



載圖書古玩列置左右浮游江湖哦詩其中因號葦航子

黃錫孫字禹疇常熟人讀書勵行居窮守約不易其介為文尚理氣詩亦清純有穀山集

周砥字履道吳人寓家無錫砥為人豪放自好始解后一售竟抑以死至正末嘗客荆溪與馬治孝常倡和成集又來吳與高徐輩為社無子友人呂敏為收其詩藏之

陳鐸字子振工於詩與鄧善之張仲實陳無遠游三君愛其詩每稱子振為吳中佳士所著詩名壯游集

凡八卷而趙孟頫為序其辭蓋不出吳中顧其壯懷如此然詩不好追蹈前人法尤足尚云弟錡字子敬張簡字仲簡少為黃冠師號白羊山樵元末兵起以養母端遂返初服有集金華王禕序之稱其類韋柳或謂其有盛唐氣象其知言哉

宋無字子虛吳人生宋景定弱冠時廢科舉惟詩是習故其詩造語新奇所著有翠寒集鄧光薦趙孟頫為序馮海粟又為摘其警句評而序之近千言尤長詠史有啗蘂集皆梓行于時嘗舉茂異不就卒年八十一自為銘誌

金可文吳人賢智有才自埋於衆以處士稱之嘗以  
丘園科不起曰幸有廬一區在市闌可以避風雨田  
一廛在郭外可以給衣食學聖賢之道可以自樂不  
願仕也故集賢院署牒錫號貞逸會稽楊維禎嘗作  
金處士歌

郭翼字義仲崑山人少力學邃于易年四十開門授  
學徒嘗署其授業之室曰遷善鄉人亦以名其居指  
南之梁曰是吾郭君之居也翼為文詞追古作者尤  
與俗寡合故雖有力者不能薦引竟以老於學宮嘗  
自號東郭生又自稱野翁所集詩曰林外野言卒于

至正二十四年葬馬鞍山下知州高昌傑侯率州人  
為治葬事

倪瓚字元鎮元末不與陳敬初輩食張氏祿避地雲  
間以自全有清閼閣尤勝客非佳流不得入茆山羽  
士張伯雨時來謁舟甫至聞報即使二童子邀於水  
次及中途又遣二童子迎侯及門又遣二童子出肅  
元鎮久之始出禮意甚恭伯雨以其久不出有難色  
詢知沐浴更衣為敬已設遂與定交嘗古衣冠坐一  
連林據梧几握筆伸紙搜吟於景象之外以寫胸中  
之逸氣張士誠弟士信聞元鎮善畫使人持絹繡侑

以幣求其筆元鎮怒曰予生不能為王門畫師裂其綃而却其幣

顧瑛一名阿瑛字仲瑛家崑山界溪以貲雄于鄉好結客輕財喜事以意氣自豪年三十始弃舊習折節讀書下士屏絕世務築玉山草堂延接縉紳之士若江湖方外之侶尤多集焉仲瑛才瞻思捷與諸老唱和角勝晚益進學若張潞公柯楊維禎鄭遂昌輩留題草堂者皆為刻梓名曰草堂雅集凡若干卷自園池亭榭扁題又率而成帙名曰草堂名勝集凡若干卷山水紀遊唱和成帙者又凡若干卷自著曰玉山

璞稿勝國之時如仲瑛之富而好文者一人而已嘗  
舉茂異及辟事皆不屑就后以布衣起佐軍以使者  
見迫于道乃東游漁釣五湖三泖間丙申歲泰州兵  
入奉母寓吳興之蘭溪母喪祝髮廬墓閱大歲經年  
五十自營壽藏曰金粟冢成與賓客燕集唱和仍戒  
令子孫葬以苧衣桐帽襖鞋布襪勿用長物為身累  
自為之誌

沈敬明字伯熙世為吳人父宋上舍生諱性然字自  
得江南內附乃構山房著道士服不與時貴接以終  
其志上舍無子敬明以女之子為後嘗應舉中江浙

辛巳備榜遂隱約終有著述聞于時

張宸字翰宸嘉定人博學工古文尤知名於書洪武初聘署儒學訓導弟翰英齊名于時

鈕月礪世居吳江麻溪少習舉子業入元遂隱不仕延祐四年賜謚清隱處士

馬國珣洞庭西山人在元嘗應召還賜號靜逸處士集賢院復賜獎諭有曰讀書學道志操侔于古人樂善安閑簡靜宜為君子不為祿仕甘分山林云

王鑑字明卿真定人少隨父宦江南遂隱居吳門博雅不喜為文獨愛唐人近體詩時時有所賦詠皆平

實沉毅如其為人家貧無甔石之儲應門獨一老婢  
客至輒叩鄰家問酒酒至對客劇飲雅善談論然不  
及時事亦未始干人晚益貧節益高閉門獨居足跡  
不出戶二十餘年張氏初入吳嘗求其廬而禮之卒  
為買地橫山葬焉陳基為銘

張介福字子祺自覃懷來吳中持身以禮為學便辟  
近裏跬步必蹈規矩以恨不及養終身不茹魚肉張  
士誠入吳兵掠其家端坐不起兵脅之刀斫其面流  
血仆地復自整冠顏色自若兵舍之而去素貧冬不  
衣絮或遺之固拒焉後廬于親墓而卒



國朝

王賓字仲光博學洽聞於書無所不讀尤精於醫用藥多神效然未嘗有與富貴人醫里巷貧人及方外士來求醫者即往診視與之藥一不望其報貌甚侵其隱也居吳之一壘藥點其面及肘股皆成瘡髮兩角短布衣曳杖行市井間或箕踞露兩股人見其醜惡咸罔之故得縉紳無薦舉者賓平生不娶奉母以居每飯必親煮羹必親調冬寒溫其衾席夏熱涼其枕簟奉養左右不敢遠離日惟閉戶閱佛書以消長日作詩文尚奇崛難深其辭年七十先母而卒至疾

輩抱母不舍死半餉復甦呼母連聲氣方絕葬後午  
間視婦于家曳履拄杖行呼曰孃孃舉室皆驚其母  
應之曰我在此復曰孃孃兒舍孃孃不得賓之篤孝  
如此賓所著述甚多今存吳下名蹟詩虎丘山志及  
其文章伯篇當時所傳有吳中名賢紀錄若交游之  
知己者惟同郡韓奕少師姚廣孝嘗為賓著傳廣孝  
昔與賓遊宦婦訪賓以與從賓不納曰勿驚我老母  
它日徒步叩門乃相見焉

王行字止仲少貧不知學父傭於閭門徐氏肆藥踰  
千品悉能志而無遺主媪異之授讀魯論即能成誦

徐氏藏書甚富乃出而恣其探閱後家北郭為童子師一時聲譽殷起臨川饒叅政居太尉府時賦詠殆遍獨艱於文間以屬行行為之說用莊騷語饒大奇其才行尤好談兵大將常公提兵至吳果用行計而士誠破晚避迹吳山之石湖稱淡如居士又嘗主梁國監公西塾薦于朝召對簡賢立相為務以其濶於事不能用後以事逮而沒

徐洪字彥弘家富甲常熟邑中號徐半州洪尚禮好士時之名勝如楊維禎倪瓚陳金輩皆延致之元季吳中豪右多踰侈國初更化彥弘諭幹人潘珪曰家

之廢興厥有常理吾家業盛矣必有代謝今將舍此而去之爾宜有吾業遂舉田宅立虛券授珪獨挈妻子築室宣化門外先隴之側布衣蔬食謝遠文游自號桃源水隱年九十而終

韓奕字公望郡中人隱於醫洪武初太守姚善下車聞奕名將見之奕避去山中善追至而泛舟入太湖善歎曰韓先生所謂名可得而聞身不可得而見也尤工於詩時稱韓山人有詩集別著易牙遺意

顧愚字原魯崑山人通五經眇目常拊几讀書其几為摩至凹兀四十年不至城府躬耕自食志在養高

時人以隱者稱之平生為文手悉焚去

丁遜學居吳山之麓隱居不仕與吳文泰以詩知名  
嘗賦杖簫詩甚奇有集一卷

朱良實字子誠吳江人在元季有文名入國朝已

老隱約不仕所著松陵續集漁唱剩稿多名人為序  
許曄字光遠洞庭人洪武間應召至京有詩經義進  
復陳省刑罰薄稅歛之策以年老乞歸上許之有  
布袍之賜今山中尚有許山人茅亭

盧充穎字次農熙之子得家學於伯父熊之嘗應辟  
留同制誥將授官熊之死負其骸骨歸遂終隱不仕

王溥字宗溥郡人宋景瀛為傳善養生術常戴櫛葉冠服大布衣出入秦淮河上發劉河間之秘注藥起人疾時作篇章有出塵之趣

蕭規字元則其先楚人國初占籍吳江徙家郡城讀書樂道不求祿仕長於春秋毛氏詩所著詩名湘山樵寓集子二人潭字孟南永樂庚辰進士終建始縣令湘字仲南薦授中書舍人

樓澄字文淵其先四明宣獻公鑰之裔孫曾祖楷宋進義校尉祖思屋元紹興路學教授父紹鄉貢進士始徙居姑蘇澄生四月而孤母守節撫育澄甚至遣

從游構李貝先生之門洪武間郡嘗有薦永樂初夏尚書治水來吳又欲薦用澄以老病辭卒年八十六所著林皋鼓缶二集

易恒字久成崑山大泗漣人守約闢園樹藝為終焉計自號泗園叟

張冑字繼孟郡人宣德初與陳繼以古文齊名于時繼以薦起而冑終布衣

孫俊字叔英崑山磧澳村人攻詩雅有高尚之志善談辨襟度洒落家有映雪齋南溪草堂好蓄古書畫而其園亭樹石尤多奇品葉文莊公甚敬重之嘗為

序其所刻南溪稿

杜瓊字用嘉吳縣樂園里人號東原生晚號鹿冠老人  
延綠亭主者有孝行以母顧守節郡舉賢良不應  
瓊為文務理致奉母有甘旨母嘗愛二至花種之堂  
下易名為如意遂名其堂而徐武功前為太史時為  
之作記常以父名玉而臨文遷避焉子繼文早世亦  
有文筆

龔翊字大章崑山人父督兵科給事中謫戍時翊年  
十八代從軍伍躬擐介冑執干戈為護步艱履危鄰  
於死者數矣既歸歛跡不出幾五十年正統間上書



極陳民情利病二十餘篇於巡撫大臣周公多所舉  
行公嘗薦之力辭晚築佚老菴於虞塘上年九十而  
終門人私謚安節先生

邢量字用理家葑門之東自少不娶居一委巷中以  
醫卜自給陳僉事永錫致政還移居東郭素剛介少  
客獨加敬重旦則挾冊就質疑難往往至昏莫乃返  
然量終歲不一至其廬也其居弊屋三四間青苔滿  
壁而折鐺敗席蕭然如野僧長日或不舉火客至相  
與清坐而已其體清瘦如削其學自經史外凡釋老  
方伎之說無不通平生懶述作門人亦嘗收錄數篇

年六十二卒預自為誌

史鑑字明古吳江穆溪里人世力穡起家弱冠即知  
務學凡經史群籍無不窮覽作祠堂易四龕之制而  
為三若祖以孫祔之類如錢穀水利無不通曉一時  
命使郡將以下咸待殊禮鑑偉貌豐髯好著古衣冠  
與人論事辨說超踔坐客不能屈嘗患巫覡惑衆上  
書縣官欲盡除之為文章紀事有法詩不屑為近體  
家居水竹之勝尤好歲三代秦漢器物唐宋書畫晚  
歲築小雅堂益務清曠早嘗與長洲沈周吳興張淵

遊

王錡字元禹長洲大家世力農吳人因其地稱荻扁  
王氏錡好學尤熟于史善談辨性尤剛直平生有所  
見聞即筆之為寓圃雜記晚益韜晦不出遂隱終身  
六歲喪父其母守節孝養四十年未嘗去左右

錢腴字時用八世祖寶文閣學士端問卒官平江因  
家長洲漕湖之錢涇父廸有高行嘗得遺金於道訪  
其主而還之腴少力學不懈平居薦於養親與人交  
謙約自持雅不信鬼物嘗抵書友人賀甫論鬼神之  
事謂小不能踰大陰不能干陽邪不能勝正其言辨  
博當理卒年六十八先二日徙卧正寢以家集一編

授諸子戒婦人不得侍側治喪勿用浮屠言已而逝  
詳見王學士英文

浦杲字東白少孤貧好學長益刻厲聞未見書必力  
購得之或手抄以讀窮日夕不厭故其學多所該識  
然惟資以為文不事進取邑每有脩纂事率杲為文  
宰邑者有所資詢往往就禮於其廬年九十卒

論曰士有名教之外別著風猷者並解桎梏於仁義  
示形神于天壤豈伏其身而不見藏其智而不發哉  
或仕不求聞退不譏俗或全身幽履服道儒門或形  
居塵俗而棲心天外宅不彌畝而忽忘九州則蒙恥

之賓視蹈海之節其流一也至阮孝緒高隱傳分為  
三品上則言行超逸名氏弗傳中則始終不耗姓名  
可錄下則掛冠人世棲心塵表品目參差稱謂非一  
矯矯然亭亭然其潁陽孤竹四皓六逸之倫與大江  
以南自披裘公角里先生之風扇于吳下梅子真臯  
伯通比肩而立放達如季鷹清退若求點高潔似魯  
望其魁然者也陶峴真淵明之裔顧歡信山谷之臣  
賢貞之操凌青雲之上矣明有王賓樓澄輩出生不  
並世跡復異區而清風峻節相望于平江太湖之上  
天下同高之豈狐兔燕雀所敢謀哉至刑量史鑑諸

君而後踵芳者稀往往名掛山人之籍跡馳卿相之  
庭多摧志屈道借譽期通以此言高則億兆之人無  
官者十居其九皆高士矣豈天之不惠高尚何山林  
之無聞甚乎昔嵇康贊高士缺一自擬二劉覽高隱  
傳凡百三十七人曰四十之數將待吾等成耶吾祖  
少耽書有隱操可以思其情之所慕矣

贊曰易尚幽人晉多徵士風扇全吳節高南紀愛止  
丘壑性同鱗羽養素含貞遠有情理道雖未弘志則  
可與霸上先生並陵季子熱匪因人徵無行軌冕掛  
東都名箴西市克嗣陶潛自况蔣詡峴製三舟翰歸

千里世味泊如放情山水孤雲何心白鳥可比

吳中人物志卷之九

吳中人物志卷之十

長洲張

魯

流寓

春秋

澹臺滅明字子羽孔子弟子南游至江從弟子三百人設取予去就名施乎諸侯索隱注吳國東南有澹臺湖即其遺跡也

西漢

東方朔厭次人久在吳中為書之師數十年武帝時



上書說便宜拜為郎至昭帝時人或謂聖人或謂凡人作深淺顯默之行或忠言或虧語人莫知其旨至宣帝初棄郎以避亂

梅福字子真成帝時上書言大將軍王鳳專勢擅朝再上書以為宜建三統封孔子之世為殷後皆不納福居家常讀書養性為事至元始中王莽顯政福一朝棄妻子去九江至今傳以為仙其後有人見福於會稽者變姓名為吳市門卒

梁鴻字伯鸞扶風平陵人家貧尚氣節嘗作五噫歌肅宗聞而非之求之不得易姓名挈妻子適吳依大

家臯伯通居廡下為人賃春每婦妻為具食不敢於  
鴻前仰視舉案齊眉伯通察而異之曰彼傭能使其  
妻敬之如此非凡人也乃舍之於家疾且革告主人  
曰昔延陵季子葬子於贏博之間不歸鄉里慎勿令  
我子持喪歸去及卒伯通為葬于要離塚傍曰要離  
烈士伯鸞清高可令相近葬畢妻子歸扶風

桓礪字文林沛郡人明帝時桓榮五世孫仕郡功曹  
後舉孝廉有道方正茂才三公並辟皆不就初平中  
避地會稽按東觀記桓礪到吳郡揚州刺史劉繇振  
給穀食衣服所乏者悉不受及適會稽止山陰故相

鍾離意會稽太守王朗給梁食布帛臨去一無所留焉

蔡邕字伯喈陳留人仕漢左中郎將從朔方還嘗避怨于吳顧雍從學琴書嘗經會稽高遷家見屋椽竹可以為笛取用之竒聲獨絕吳人有燒桐以爨者邕聞火烈之聲知良木也材以為琴果有美音而其尾猶焦時名焦尾琴云

晉

戴逵字安道譙郡人隱遁有高志吳國內史王珣別館在虎丘山逵潛詣與之游處積旬號吳中高士後

復還剡子顯欲干祿以為養乃求海虞令垂行乃止  
復居吳下士人共為築室聚石引泉植林開澗少時  
繁密有若自然乃述莊周大旨著逍遙論禮記中庸  
篇三吳守將及郡内衣冠要其同遊堪行便去不為  
矯介宋國初建辟召並不就文帝每欲見之謂黃門  
侍郎張敷曰吾東巡之日當宴戴公山下也

褚伯玉字元瑗錢唐人卓有隱操居剡瀑布山下三  
十餘年王僧達為吳郡禮致之停車信宿交數言而  
退寧朔將軍丘珍孫與僧達書曰聞褚先生出居貴  
館此子滅景雲栖不事王侯有年載矣自非折節好

賢何以致之僧達答曰褚先生從白雲游舊矣冀其  
來比談芝桂借訪薜蘿若已窺烟液臨滄洲矣唐丘  
丹詩云還同褚伯玉入館忝州人

唐

殷懌字易從潤州曲阿人少負志氣博學屬文天寶  
末天下將亂趣裝東歸侍母居吳吳之士夫樂與之  
游採訪使李希言辟為從事奏授崑山尉不就子侑  
張祐字承吉南陽人寓居蘇州有詩名白居易刺杭  
時江東進士多奔杭取解屬時以素望取士祐自意  
必首薦既而徐凝冠多士祐遂偃蹇不隨鄉試令孤

楚鎮天平表祐新舊格詩三伯篇以獻祐至京師為  
元稹所抑寂寞而歸嘗自號釣鰲客會昌初李紳節  
度淮南壯其為人厚加禮致祐長於宮詞掖庭多吟  
諷之杜牧之守池與祐為詩酒友寄詩云誰人得似  
張公子千首詩輕萬戶侯當時以為故實大中間卒  
於丹陽

宋

徐彥伯字長孺金紫光祿大夫執中之子高士劉凝  
之之壻年四十卒黃庭堅為墓碣稱為姑蘇孝友文  
學之士少刻苦讀書多見博聞作詩得張籍句法又

云徐氏非蘇人唐末避亂家揚州之六合金紫始遷于蘇雖田宅在焉而猶返葬六合

徐祐字受天通州靜海人擢進士為吏以清白稱慶曆中官至都官郎中致仕屏居蘇州作山亭胥門外為登臨之地與葉少卿參等為九老會子仲謀典郡持節以職方郎中致仕

張景脩字敏叔常州人治平四年進士寓居郡中少刻苦作詩至老不衰初為饒州浮梁令邑子朱天錫以神童應詔景脩作詩送之天錫到闕忘取本州公牒為禮部所拒因擊登聞鼓繳景脩所送詩為證神

宗一見大稱賞之以語丞相王珪曰恨四方有遺材  
趣令召對珪言不欲以一詩召人恐長浮競俟其秩  
滿赴部令中書籍記姓名比景脩罷官而神宗升遐  
矣景脩歷官三朝兩為憲漕五典郡符每登對上必  
問卿作朱童子詩試為舉似由此詩名益著官至祠  
部郎中卒年七十餘有詩集藏于家子漢之知崑山  
縣

米芾字元章襄陽人愛潤州山水結海岳菴嘗游寓  
于吳為文奇險妙於翰墨畫山水人物自名一家精  
於鑒裁遇古器物書畫極力求取性又好石遇嘉石



輒朝服而拜之有晉人風度子女仁世號小米官于是女亦歸于是故宋史稱為吳人

賀鑄字方回衛州人僑居吳下少豪俠氣蓋一坐馳馬走狗飲酒如長鯨然過空無所有輒俛首北窓下作牛毛小楷雌黃不去手反如寒苦一書生其儀觀甚偉如羽人劍客戲為長短句皆雍容妙麗極幽閑恩怨之情其言理財治劇之方疊疊有緒似非無意於世者然遇軒裳角逐之會常如怯夫處女初授右班殿直薦改承事郎年五十八致仕復起管勾杭州洞霄宮以朝奉郎致仕卒年七十四有文集二十卷

蘇舜卿字子美梓州人少慷慨有大志好為古文歌  
詩一時豪雋多與之遊初父廕補官後舉進士歷官  
集賢校理監進奏院坐事除名來寓蘇州報書其友  
韓維大抵以遠憂患息奔走為言且曰晁史琴尊之  
外有興則汎小舟出盤閭二門吟嘯覽古於江山之  
間渚茶野釀足以消憂尊鱸稻蟹足以適口又多高  
僧隱君子佛廟絕勝家有園林珍花奇石曲池高臺  
魚鳥留連不覺日暮夫人生內有自得外有所適固  
亦樂矣何必高位厚祿役人以自奉然後為樂耶得  
吳越故家池館買水石作滄浪亭益務讀書間為歌

人紀卷十  
詩以泄憤懣善行草書酒酣落筆爭為人所珍愛其  
雅趣曠達人比李太白在江東也後得湖州長史卒  
年四十一子泌湖北路運使

尹焞字彥明洛陽人少師事程夫子嘗應舉發策議  
誅元祐黨人不答遂棄去程沒授徒洛中靖康初布  
衣乃不至褒號和靜處士戶部尚書梅執禮中書舍  
人胡安國等奏請優加旌擢不報金人陷洛闔門被  
害焞死復蘇劉豫以禮聘之溺水逃去自商州奔蜀  
至閬得程氏易傳紹興五年以崇政說書召凡二十  
辭八年冬始入見除祕書郎明年遷太常少卿權禮

部侍郎除徽猷閣待制提舉萬壽觀辭不已遂奉外  
祠卽寓平江虎丘西菴時年七十矣卒于會稽寓舍  
張子顏字幾仲循王浚之子寓居平江乾道九年以  
敷文閣待制知信州淳熙八年移知紹興除顯謨閣  
直學士與祠再知鎮江府奏蠲丹陽夫役民甚德之  
劉過字改之廬陵人宋南渡後以詩俠名湖海間陳  
亮陸游卒棄疾世稱人豪皆折節與之為友丞相周  
必大聞其名欲客之門下不就故人潘文友宰崑山  
延致之過雅志欲航海因抵文友死葬馬鞍山中過  
嘗抗疏光宗請過宮嬖與時宰陳恢復方略勇請用

兵謂中原可一戰而取詞極剴切尤為諸君所推許  
性喜飲酒詞氣豪放英特如中原在望莫登樓之句  
讀之使人悲感又如斗酒彘肩風雨渡江豈不快哉  
有詞傳世

吳惟信字仲孚湖州人寓居嘉定之白鶴村以詩鳴  
宋季有菊潭集行于時郡人有廩先生者進士筭食  
諸父也記問該博九經注疏悉能成誦科舉之文未  
嘗謄稿然垂老不預貢士籍時惟信客吳見其所作  
亟稱之一日遇惟信扣之為誦一絕云白髮傷春又  
一年閒將心事卜金錢梨花瘦盡東風軟商略平生

到杜鵑靡不覺下拜曰天才也老夫每欲効顰則漢高祖唐太宗追逐不少置矣蓋前輩服善如此

徐復字希顏莆田人博學於書無不讀旁通星曆五行術數之說仁宗召見於崇政殿命講易又獻所為

集

遠防策欲官之固辭高其行禮以求帛賜號冲晦處士復嘗游寓吳中最久詳見曾鞏所為傳

黃居簡字元易建安人寓吳縣南宮鄉工於詩嘉熙中卒通判翁逢龍為葬虎丘

楊傑字子寬和王之子仕至工部侍郎卒贈少師謚惠懿有別業在洞庭故堂寓焉具詳於洪邁所撰神

道碑

趙磻老字渭卿東平人居吳江黎里門下侍郎野之  
從子以婦翁歐陽待制懋澤入仕孝宗朝以書狀官  
隨范成大使虜成大薦擢正言乾道八年以右通直  
郎知楚州明年入為太府寺丞淳熙三年由兩浙轉  
運副使知臨安府除祕閣脩撰權工部侍郎坐殿司  
招兵事謫饒州有拙菴雜著三十卷外集四卷

程俱字致道由吳江縣令後以致和間監舒州茶場  
論時政不合寓吳下葺所居名蝸廬有北山小藁

崔敦詩字大雅通州靜海人晚寓常熟紹興間進士

累官中書舍人加侍講直學士院賦性端厚文詞溫  
潤議論䟽通知大體所陳對必剴切上深器許之卒  
贈中大夫有文集三十卷內外制稿二十三卷奏議  
總要五卷通鑑要覽六十卷制海十編監韵十編

王邁字處一家本婺州父徙濠梁晚寓常熟登嘉定  
十六年進士仕至太常少卿奉祠家居凝塵滿榻淡  
如也卒年四十八理宗稱其立朝蹇諤古之遺直為  
郡廉平古之遺愛特贈集賢殿脩撰賜謚忠惠邁忠  
伉有大志究心當世之務尤精于邊防要害談經不  
涉於支離與人交不為崖異之行蘊畜深厚莫窺其



際有時習編書志編若干卷

薛子長從葉適游學於吳荏門適嘗叙其覆瓿集子  
長嘗出老翁賦續通鑒論適見而驚異之謂神馬汗  
血尾鬣不掉而行流無疆累名駿數百豈得望塵焉  
至錢唐又出土風論則疑愈甚或謂子長負絕世筆  
墨區區名不與常人比故多怒譏誠然哉然其自護  
如處女藿食水飲慾利不掛絲髮其學長鋪廣引浩  
絕河漢曹陸以下不能擬其藩也

鄭準字器先開封人華原郡王之諸孫也祖父皆寓  
崑山準由蔭補魁鈴闈登慶元進士歷仕知袁州進

生長王侯家氣習儒素薄於功名厚於道義輕財好客赴人之急尤加意睦族買田給贍之有文正公義莊之風子孺守高郵姪竦知泰韶袁三州

方萬里字子萬嚴州人四歲失父與兄奉母寓于吳登嘉定四年進士以朝奉郎知江陰軍累躋朝署再秉州麾問學踐履為海內所慕趙汝述守平江遇萬里厚汝述卒一時賓客散去獨萬里護喪而往人多義之子洪字養厚

鄧若水字平仲隆州井研人為文章有奇氣布衣時吳曦叛欲殺縣令乃仗劍徒步如武興欲手刃曦道

聞曦死遂還人竊笑其狂而壯其志理宗即位應詔  
上封事言史彌遠不立濟王而立陛下握大權以擅  
國政以格當改官為彌遠所抑不復仕進隱太湖之  
洞庭山賈似道在京湖聞其名辟叅軍事若水雅思  
其鄉乃起從其招由是歸蜀居山中

魏了翁字華父臨邛人慶元五年進士累遷校書郎  
親老乞補外知嘉定府行次江陵蜀將吳曦叛既誅  
了翁奉親還鄉朝廷收召諸賢了翁預焉會史彌遠  
專國乃辭召命以憂解官築室于白鶴山下開門授  
徒以義理之學淑諸人知漢州首蠲積逋二十餘萬

又知眉州俗號難治了翁至乃尊禮耆老簡拔俊秀  
舉行鄉飲酒禮士論大服

高定子字瞻叔了翁同產兄也起知潭州賜第平江  
封臨卽縣侯資政殿學士致仕卒贈少保所著有經  
統五卷并文集奏議講義類為若干卷

卽應雷通州人父武子招信軍判官來寓常熟登嘉  
熙進士歷知廬和二州兩淮安撫制置使知揚州兼  
淮東提舉卒贈端明殿學士弟應飛字德遠淳祐進  
士調永嘉尉改淮西制機遷戶部侍郎知鎮江府元  
兵圍鄂嘗帥師救鄂解去卒景定中贈朝議大夫

元

李祁字一初長沙人元李齊榜進士始尚書宋誠夫  
監丞揭昺碩讀其廷對擬甲是科啓緘乃南士遂改  
次齊會齊病上表謝恩乃祁也授文林郎應奉翰林  
文字連丁內外艱改同知婺源州事轉儒林郎江浙  
儒學副提舉後用憲臣薦入風紀值兵亂不果所著  
述有雲陽集刻于永新祁人品高尚胸次廓然其文  
不事剗刷而邊幅自然詩亦如之祁嘗寓吳故吳中  
多所作云

柯九思字敬仲台州仙居人父謙由文學掾為江浙

提舉九思以廕補華亭尉不就遇文宗于潛邸及即位擢為典瑞院都事置奎章閣特授學士院鑒書博士凡內府所藏法書名畫咸命鑒定賜牙章得通籍禁署念其父善教賜碑名訓忠勅學士虞集撰文于碑寵顧日隆由是言者見忌九思乘間白上曰臣以文藝末技遭逢聖明而踪跡孤危殞越無地願乞補外以自效庶幾仰報日月照臨之萬一上曰朕在汝復何憂翌日御史章入不報故事諫臣言不行則納印請去上重違諫臣意召九思諭之曰朕有意留卿而欲伸言者路已勅中書除外卿其少避俟朕至京

宣卿九思拜泣辭出而中書竟格詔不行未幾文宗崩因流寓吳中至正乙巳得暴疾卒年五十四九思善畫竹石得筆法于文同嘗自謂寫榦用篆法枝用草書葉用八分或用魯公撒筆法木石用金釵股屋漏痕之遺意然其生意飛動有龍翔鳳翥之狀云

邁里古思字善卿武威人寓吳最久有才名浙水間以進士起家為紹興路錄事司達魯花赤能以直道行得士庶心時遠近騷動遂練民為兵數擊叛亂有功與浙省左丞楊完哲討方國珍往往以法誅部曲無所顧望名既上聞乃遷江東道肅政廉訪司經歷

未幾改樞密院判又大出師以討不庭而臺端有忌之者召至私第使健者候于門擊殺之

買住高昌人榮祿大夫前江西等處行中書省平章政事告老懸車吳下四子稟雅實立方為吳江州達魯花赤相哥實立廣東僉憲普達實立字仲溫歷官奉政大夫左右司郎中阿蘭納實立岳州平陽州達魯花赤

完哲字清卿江陰上萬戶贈都元帥君廝公之弟泰州不守以材譖擢萬戶遷福建參政亂後歸養吳中昂吉西夏人授紹興錄事參軍多寓吳中為人廉介



不獨著述可稱行亦足尚

呂某汝陽人以中大夫松江府知府致仕寓居吳郡始為平江推官治獄不寃者績吳大水民多流亡富人閉糴長吏治之不以道江浙行省乃以屬推官即日聚其人諭以義更走屬邑勸之凡得米三十六萬石以賑之及移建康又饑行御史臺仍以屬如平江得米五萬石兩郡人至今誦之及移巴蜀浙南治績尤著

李君燕人也亡其名字結交天下知名之士如暢純父高彥敬焦達卿鮮于伯機李仲方若仲賓則從兄

弟而劉嗣宗守蘇州其姻家也諸公多以姓名言于  
上宣授泉福司提舉辭避南遊劉蘇州迎入吳四方  
朋舊至者則典衣慰藉不失其歡心而不一令劉公  
知也劉卒于吳李衣紫縷盡無所歸遂僑居吳下竟  
卒李平日能以禮自居一語不合意便引去子志祖  
與其室人皆卒孫謙北還燕後十年南來吳奉三喪  
歸葬之

郭炯字子昭蔡州人少與金華許謙同受業自浙東  
憲史為御史掾性介潔平正所至有聲辭歸奉母寓  
于吳遣子從學嘗遺書論教子讀經史必須精究精

則通乎其微究則達乎其極

呂浩叟故宋臣至元十一年下江南出使軍前持節見淮安忠武王抗詞不屈明年南邦混一宋臣悉朝于京浩叟與焉授嘉議大夫淮東宣慰使仍賜金符玉帶寵遇甚至浩叟拜命即以疾辭歸寓吳中即虎丘之陰構壽樂堂後卒葬其地

潘純字子素廬州人嘗游京師一時文學之士貴介之族爭延致之每宴集談笑傾座輒云潘君不在令人無歡嘗著輓卦以諷切當世其初之辭曰出門即輓永無咎也其上曰以輓受爵亦不足貴也或以達

于文宗目為滑稽士欲擊治之亡走江湖間於是挈  
妻子居吳中

龔開字聖予淮陰人少負才氣博學好古尤邃經術  
宋季與陸秀夫同居李庭芝幕府宋亡來居吳下節  
愈孤峻嘗為丞相文天祥及秀夫作傳金華吳萊見  
之稱其不減遷固居吳日與高郵龔璠為忘年友時  
比漢兩龔開詩筆老有骨游戲翰墨為山水人馬皆  
卓絕不凡世爭寶之

林寬字彥栗東嘉樂清人父為崑山主簿留居姑蘇  
而卒葬湖州之烏程寬七歲能屬文十歲盡記誦六

經十二以書干東平徐子方召問經義條對響應目  
為神童寬為學益力父恐其勤苦致疾嘗禁其夜讀  
寬密藏火俟親寐潛起微誦至旦十七喪父寒暑衰  
經不去身衰毀過節家素清貧能自立不易所守從  
遊甚衆年二十九卒

鄭元祐字明德遂昌人生而右臂脫骭動必以左號  
尚左生年十五輒能詩賦徃徃出奇語驚人於書無  
所不讀為文有古作者風時咸淳諸老猶在皆折節  
下之父石門君卒始來居吳省臺宣闢交章以薦皆  
不就素不善著書嘗謂學者曰經則經也史則緯也

義理淵藪在焉學者能盡得古人之意者鮮况敢私有所論述乎識者稱其有見清談雅韵依稀晉人所著有遂昌雜錄一卷

陳基字汝初台之臨海人幼孤與兄聚從游于金華黃文獻公之門遂依文獻遊京師授經進檢討其徒有為御史者以言責謫于基基謂並后為致亂之本因草諫章力陳其失欲寘其罪遂引避南歸至吳教授諸生屬南北用兵開行樞密府基為都事轉江浙行中書省郎中時張士誠為太尉基參謀軍府事及士誠自王基獨諫止已而超授內史遷學士院學士

階通奉大夫覃恩二代凡飛書走檄碑銘傳記多出  
基制作 國朝平吳從士誠入京餘多被誅基獨得  
全預脩元史書成而還基先寓吳買宅天心里葺所  
居名小丹丘洪武三年卒于常熟河陽寓舍為文清  
雅所著有夷白齋稿若干卷兄聚字敬德尤工文名  
家

陳方字子貞京口人宋丞相升之之後兄子原仕天  
台學正方嘗赴省試來吳元帥王公招致賓席故寓  
于吳龔子敬妻之以女吳之名勝如鄭明德張伯雨  
倪元鎮皆與之游晚主無錫華彥清家塾日詩由日

鍛月鍊然後工亦由隨事感發肆然為之然後熟又  
嘗手鈔杜詩一編朱書小字夾注其說某為對起對  
結某為散起散結或緣某句應某字或由某意發某  
語脉絡有自來枝葉有所傳方真知詩者也吳人嘗  
刻方詩以傳後不知所終

朱子昌字可大温州平陽人晚家吳為江陰郡博士  
後游京師公卿論薦授浙西道儒學副提舉慨然以  
道為任門人稱為鶴臯先生卒於大德六年葬長洲  
縣楓橋龍山之原史孝祥為其誌墓子梓瑞有文行  
鄭東字季明溫之平陽人客於崑山弟采字季亮性



捐介州里不能容因來就寓疾讀四庫書晚又同寓  
海虞東天分絕人嘗矻矻窮經再踐塲屋不合主司  
棄去肆力於古作歐陽文公玄嘗薦之會東病卒采  
亦坎壈終東為文多不罾稿僅存百篇采之所著三  
十餘篇而已宋景濂所叙聯璧集是也東子思先入  
國朝為磨勘司令

張大永字長年其先泰郵之兩伍人父景星以儒薦  
累官建康路教授余忠愍公銘其墓天永自淮奉母  
避兵于蘇之嘉定績學砥行文譽日隆右轄張公薦  
授江浙行省都事

董遠字仁仲天台人父惟一元醴陵州蒙古教授遠少以遠大自期不事家人生產精朱氏詩兼通左氏春秋至正中兩試有司不中遂留錢唐潛心古學不復以科舉為意已而入吳止天平山復寓松陵之梅花莊張士誠聞遠名遣使奉書幣迎之遠受書返幣堅卧不起使及門者再乃避地錦峯依浮圖氏以居吳元年徵赴京師以沉默不稱旨謫居濠梁八年以薦授興化府莆田縣知縣時年六十餘矣其治莆田以循良稱後卒于吳

焦白字任道淮人遷于吳才志不羈張氏辟湖學教

授辭去客泖海上間作詩畫率不凡或濯風弄泉曳  
影月下俗目之曰迂白張氏所在蒐儒遂變名曰德  
乙卽浮寄冗食僧舍惟久於嘉定林原家一夕心動  
省毋吳城為門校察延淑諸子未幾郡曹迫至部日  
以還養告弗獲寔且病或諷曰若願而髯黃金加鞶  
爵列侯等不猶愈於帶索耶輒不荅去殆伏枕作書  
一二囑嫂姪善事毋一謝諸舊卒年甫五十父文炯  
天曆間署奉禮

方澗字叔國其先莆陽人至澗居吳中閉門讀書恒  
教授以自給平生善詩然性不苟作作必過人尤工

筆札年七十七有詩一卷

王應甫字夢聲嚴州人登咸淳進士祕書省檢閱致仕至元初起為崑山儒學教授兵燹後嘗為學宮一新遂寓居焉

孔淵字世陞宣聖五十二代孫父監通州稅來居崑山延祐初州治遷太倉新作學宮以文行為士林所推遂攝學事子克讓亦以文學世其家

范致大字伯原崇德人脩行博學會淮張氏入吳辟為教授不赴既陪臣於張者禮置焉致大曰道固在耳

王貞字履道江都人嘗避地吳下太尉開藩博采群材以儒學辟不受竟歸

惠連字子及曾大父疇實章閣待制常德知府司署少卿卒連學于陸子方嘗述江革郗鑒二贊兵亂自江陰奉母間闕避地寓居於吳

王嘏字伯純河東人由鄉貢擢儒學正張太尉辟為常熟教授辭歸葬其祖父妣三喪于鄉

柳貫字道傳浦江人為翰林待制以古文與晉卿齊名嘗寓甫里有遷居甫里精舍詩并為甫里書院記張天模字楠渠溫州人嘗為國子助教寓居吳中肆

力為詩章尤善樂府馳驟二李間

熊夢祥字自得江西人博學通音律能作數體書寫山水尤清古無俗工狀以茂才舉教官不樂拘制輒棄去以詩酒放浪卜居婁上

俞登字泰卿福州長樂人早孤母夫人親授以書宋亡隱寓太倉累徵不起延祐中卒門人私謚曰貞節先生子焯字元明嘉定進士有文名

文質字學古甬東人寓吳之婁江有詩名好為長吉體酒酣長歌聲振金石游京師為朝貴所重

于立字彥成南康人故宋名將家博通古今學道會

稽山中得石室藏書遂放浪江湖愛吳中山水清曠故多寓之

項炯字可立臨海人端行積學為時名人嘗寓吳中陸氏甫里書院

顧盟字仲贇甬東人高才博學館寓吳中

吳叡字孟思濮陽人工篆籀之學究知六書晚寓崑山至正十五年卒卜葬湖州封禺山劉伯溫誌其墓叡嘗以書授朱珪故吳中多其手迹

趙壁其先睢陽虞城人宋觀文殿學士槩之裔以明經薦授崑山州學正遂寓家崑山

戴宗字宗愈廣陵人性淳謹寡言笑陳敬初雅重其  
為人學通五經寓吳授業者甚衆

唐肅字處敬會稽人為皇岡書院山長轉嘉興儒學  
正嘗寓吳館左轄呂公所

戴良字叔能金華人嘗仕元淮南儒學提舉留寓吳  
門其所著有吳游稿

姜漸字羽儀諸暨人學識超卓至正間兵變奉其父  
僑居吳中張氏起為淮南行中書左右司都事後退  
歸著述為事父卒葬吳之高峯山

倪瓚字元鎮無錫人元季鬻田百千緡悉與張伯雨



晚年扁舟江湖多依止僧房道館寓松陵與陸靜遠  
虞勝伯為友靜遠子頤其子壻也過城廓則與陳惟  
寅惟允周正道陳升方輩游嘗自寫影留道家有潔  
疾每盥頰易水數十次冠服著時亦數十次振拂家  
有清閔閭閻前梧石日令洗拭尤好焚香畫法巨然  
書學黃庭

國朝

李幹字貞臣睢州人仕元薦授許州同知後以本部  
侍郎佐擴廓統兵坐營值事急出巡天兵俘置鎮江  
已而選入司農司議禮議律議官制皆預焉立六部

為吏部郎中兼秦府相參軍召議藩封後斥往寧夏  
慶府數詩賚贈之戊寅為翰林待詔直內閣榦年老  
遂致仕來蘇依友人盛逮年八十六卒逮為買地黃  
山葬之邑人王賓為誌銘榦通先代典章明國初制  
作其論議英宕為時所稱重云

張來儀初名羽其先潯陽人徙居湖州菁山入國  
朝為太常寺丞早有俊聲與高啓楊載徐賁齊名稱  
為吳中四傑又寓于吳有靜居集

徐賁字幼文蜀山人寓吳北郭因名所著詩曰北郭  
集嘗仕為參政

盧昭字伯融閩人博通經史尤長於文詞洪武初起為揚州教授

楊諲字履祥浦城人博學多著述有宋著龜錄若干卷又嘗脩崑山誌已上三人皆僑寓太倉

林鍾字仲鏞其先世東魯祖德載為崑山州同知授承務郎父補字仲山號林中散人性孝友攻詩文以蔭官華亭尉當元季以不仕張氏壽終洪武二十二年辟鍾為崑山文學掾遂家焉後知澧州慈利縣永樂初入為考功郎中擢山東參政所著有松谷集  
陳潛夫錢唐人徙居崑山學行優邃洪武九年以縣

學訓導陞國子學正

謝應芳字子蘭崑陵人避兵寓居葑門嘗脩復晉顧元公祠墓有懷古錄一卷應芳平生好古其所著有龜巢摘桑梓行于時

王彝字常宗其先蜀人父允中教授崑山州學因著籍嘉定彝博學無所不窺文尤嚴峻洪武初與郡人高啓謝徽杜寅傳著被詔同脩元史史成授官辭之而歸時江夏魏覲守郡賓禮賢士未幾以事被逮彝與啓嘗為覲作文連坐死于京市

莊公瑾松江青龍鎮人永樂間寓居葑門能詩善草

書尤長於畫師法馬夏蓋張觀後一人也觀字可觀  
嘉善人畫師夏圭馬遠與嘉興吳鎮遊筆力益古勁  
尤善鑒古器物書畫壯遊湖海返故鄉卒

殷之輅嘉興人以詩遊江湖間晚寓長洲沈孟淵氏  
及卒孟淵為葬之之輅有笑疾

鄒彬字文質陝之臨洮人早游齊梁又去之淮揚樂  
吳之風土也因寓焉彬博物多識凡天文地理醫藥  
卜筮皆旁通之平生手鈔百氏書殆千卷紙欄烏絲  
字畫不苟矻矻筆硯間至老益勤性寡合于人質莊  
重可敬嘗論張仲景傷寒書撰運氣或問一卷謂三

奇六壬太乙之法蓋河圖易書之緒餘第多傳會誤  
疏畧一卷卒葬長洲武丘鄉

論曰人美于中必播于外而越于民民實懷之玉在  
可珍奚必盡生藍田也昔桓公問致天下之精材管  
氏曰五而六之九而十之三倍不遠千里致天下之  
士猶是焉起于北意南而至于南起于南意北而至  
于北如鳥之還山集谷矣虞仲隱北山之下呂尚居  
東海之濱山遂名虞湖仍曰尚虞仲兆其始呂尚扇  
其風澹臺滅明至自春秋方朔梅生光于漢日戴公  
山名于晉代張公子詠自唐風宋元以降其流逾廣

徐祐成九老之會米芾結海岳之菴舜欽報書于韓  
維興寄盤閭二門之間尹焞逃聘于劉豫身寓平江  
虎丘之側若水隱太湖之洞庭磻老居吳江之黎里  
賀鑄焦白以豪俠稱徐復王邁以高行著黃居簡吳  
惟信以詩篇顯張子顏程俱以宦績名方萬里呂浩  
叟之忠義鄭準陳基之友睦完哲林寬之孝養邁里  
古思之勲庸柯九思龔開之文藝昂吉之廉謹倪瓚  
之介潔鄭元祐王貞之隱操董遠之經術至陳潛夫  
鄒彬數君子咸有梅生梁鴻之風以今方古非但不  
覩之而已然鴻非臯伯通終於賃春邕非顧雍誰其

從學戴逵得王珣與之游處褚先生非僧逵何以致  
之不有地主之賢將屢適越何知其可紀哉張景脩  
送朱天錫詩不特勝公據于禮部卒大稱賞于神宗  
主遇好文尤為盛事若江淹禮吳中石佛李嘉祐經  
吳中載之歌詩不克殫述茲叙其人列其行以脩流  
寓篇云

贊曰棹是遊吳屨非適越登耀紫闈參名盛列心迹  
清全退素自業辭論如流文體異絕寄人廡下立志  
裁割意賄殊常性不柰雜少寄情賞中途不輟歲月  
過淹名謚凋滅秋聲春庚脂車解榻衰草華風英標



峻節

吳中人物志卷之十